

Na osnovu člana 16. stav 4. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona”, broj: 7/10), a u skladu sa članovima 33. i 46. Zakona o izvršavanju Budžeta Zeničko-dobojskog kantona za 2022. godinu („Službene novine Zeničko-dobojskog kantona”, broj: 1/22), na prijedlog Ministarstva zdravstva, Vlada Zeničko-dobojskog kantona, na 147. sjednici, održanoj dana 25.03.2022. godine, d o n o s i

## **ZAKLJUČAK**

**o usvajanju Programa utroška sredstava planiranih u Budžetu Zeničko-dobojskog kantona za 2022. godinu na poziciji „Kapitalni transferi drugim nivoima vlasti- za zdravstvo“**

### **I.**

Usvaja se Program utroška sredstava planiranih u Budžetu Zeničko-dobojskog kantona za 2022. godinu („Službene novine Zeničko-dobojskog kantona”, broj: 1/22) na poziciji „Kapitalni transferi drugim nivoima vlasti - za zdravstvo“ u iznosu od 3.000.000,00 KM (slovima: trimiliona konvertibilnih maraka), koji čini sastavni dio ovog zaključka.

### **II.**

Sredstva planirana Budžetom Zeničko-dobojskog kantona za namjene predviđene ovim zaključkom realizovat će se isključivo u skladu sa realizacijom ostvarenih javnih prihoda u Budžetu Kantona.

### **III.**

Zadužuju se Ministarstvo zdravstva i Ministarstvo finansija da realizuju ovaj zaključak, svako u okviru svojih nadležnosti.

### **IV.**

Zaključak stupa na snagu danom donošenja.

Broj: 02-\_\_\_\_\_/22  
Datum, 25.03.2022. godine  
Zenica

**PREMIJER**  
**po ovlaštenju**

*Spahija Kozlić*

DOSTAVLJENO:

1x Ministarstvo zdravstva,  
1x Ministarstvo finansija,  
1x a/a.

**BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
MINISTARSTVO ZDRAVSTVA**

**PROGRAM  
UTROŠKA SREDSTAVA PLANIRANIH  
U BUDŽETU ZENIČKO-DOBOJSKOG KANTONA ZA 2022. GODINU  
NA POZICIJI  
“KAPITALNI TRANSFERI DRUGIM NIVOIMA VLASTI - ZA ZDRAVSTVO”**

*Zenica, mart 2022. godine*

## I UVOD

### 1. Pravni osnov

U skladu sa članom 33. stav (3) Zakona o izvršavanju Budžeta Zeničko-dobojskog kantona za 2022. godinu („Službene novine Zeničko-dobojskog kantona“, broj: 1/22), sredstva utvrđena u razdjelu 21 – Ministarstvo zdravstva, budžetska organizacija 01, potrošačka jedinica 0001, pozicija „Kapitalni transferi drugim nivoima vlasti - za zdravstvo“, koristit će se prema programu utroška, odnosno prema aktima koje donosi Vlada Kantona.

U skladu sa članom 46. stav (1) Zakona o izvršavanju Budžeta Zeničko-dobojskog kantona za 2022. godinu, Ministarstvo zdravstva predlaže Vladi Zeničko-dobojskog kantona program utroška sredstava iz člana 33. navedenog Zakona, a stavom (3) istog člana Zakona propisani su bitni elementi programa: naziv programa, svrha programa, visina sredstava, izvori iz kojih će se finansirati i kriteriji.

Članom 13. stav 2. Zakona o zdravstvenoj zaštiti („Službene novine Federacije Bosne i Hercegovine“, broj: 46/10 i 75/13) propisano je da Kanton osigurava sredstva za vršenje osnivačkih prava nad zdravstvenim ustanovama čiji je osnivač, a koji obuhvata investicijsko ulaganje i investicijsko i tekuće održavanje zdravstvenih ustanova, prostora, medicinske i nemedicinske opreme i prevoznih sredstava, te informatizaciju zdravstvene djelatnosti u skladu sa mogućnostima Budžeta Kantona.

Članom 13. stav 4. Zakona o zdravstvenoj zaštiti propisano je da Kanton osigurava sredstva za ostvarivanje društvene brige za zdravlje.

U skladu sa Zakonom o razvojnom planiranju i upravljanju razvojem u Federaciji Bosne i Hercegovine ("Službene novine Federacije BiH", broj: 32/17) i Uredbom o trogodišnjem i godišnjem planiranju rada, monitoringu i izvještavanju u Federaciji Bosne i Hercegovine ("Službene novine Federacije BiH", broj: 74/19 i 2/21), potrebno je program utroška sredstava uskladiti sa Strategijom razvoja Zeničko-dobojskog kantona za period 2021.-2027. godine, kao i sa Strategijom razvoja zdravstva u Zeničko-dobojskom kantonu za period 2016.-2025. godine, na način da se osigura ostvarenje strateških ciljeva kroz implemetiranje aktivnosti utvrđenih ovim strateškim dokumentima.

Pandemija izazvana virusom COVID-19 koja je obilježila čitavu 2020. godinu i 2021. godinu, nastavljena je i u 2022. godini, što zahtijeva planiranje određenih sredstava za neophodne nabavke koje će biti u funkciji sprečavanja širenja pandemije i liječenja pacijenata oboljelih od COVID-19. Iz Budžeta Zeničko-dobojskog kantona za 2020. i 2021. godinu izdvojena su značajna sredstva za nabavku neophodne medicinske opreme i građevinske radove (JU Kantonalna bolnica Zenica). Pored toga u toku 2021. godine iz sredstava Projekta COVID-19, koji implementira Federalno ministarstvo zdravstva nabavljena je neophodna oprema za zdravstvene ustanove. Imajući u vidu navedeno u Budžetu Zeničko-dobojskog kantona za 2022. godinu planira se manji iznos sredstava za kapitalne transfere koji su u funkciji sprečavanja širenja virusa COVID-19 i liječenja pacijenata oboljelih od COVID-19, ali su ista morala biti planirana kako bi bila spriječena situacija u kojoj bi postojala potreba za određenim nabavkama, a nisu obezbjeđena sredstva u Budžetu.

Vlada Zeničko-dobojskog kantona donijela je Odluku o raspodjeli planiranih sredstava u Budžetu Zeničko-dobojskog kantona za 2022. godinu na poziciji „Kapitalni transferi drugim nivoima vlasti - za zdravstvo“, broj: 02-11-3871/22 od 10.03.2022. godine kojom je utvrđena raspodjela kapitalnih transfera za redovne kapitalne transfere (2.550.000,00KM) i kapitalne

transfere čiji je cilj sprečavanje širenja zarazne bolesti izazvane virusom COVID-19 (450.000,00KM), a koja je osnov za donošenje Programa.

## **2. Naziv programa**

Sredstva kapitalnih transfera za zdravstvo sa pozicije Ministarstvo zdravstva Zeničko-dobojskog kantona koristit će se po programu pod nazivom:

Program utroška sredstava planiranih u Budžetu Zeničko-dobojskog kantona za 2022. godinu na poziciji „Kapitalni transferi drugim nivoima vlasti - za zdravstvo“.

## **3. Ciljevi programa**

Pored činjenice da su navedena ulaganja zakonska obaveza za zdravstvene ustanove kojima je osnivač Vlada Zeničko-dobojskog kantona, planiranjem određenih sredstava za zdravstvene ustanove kojima je osnivač grad/općina, doprinosi se poboljšanju kvaliteta zdravstvene zaštite u cjelini.

Izdvajanjem sredstava za namjene utvrđene Programom doprinosi se realizaciji programa iz Strategije razvoja Zeničko-dobojskog kantona za period 2021.-2027. godine pod nazivom „Unapređenje kvaliteta i načina pružanja usluga“, tj. doprinosi se:

- podizanju zdravstvene zaštite na viši nivo kroz nabavku neophodne medicinske i nemedicinske opreme,
- humanizacija uslova za boravak pacijenata i povećanje zadovoljstva zdravstvenih radnika poboljšanim uslovima rada i boravka u prostorima namjenjenih liječenju pacijenata kroz izgradnju i adaptaciju novih i postojećih građevinskih objekata
- obnavljanju zastarjele opreme,
- povećanju zadovoljstva korisnika zdravstvenih usluga,
- smanjenju odliva sredstava u druge kantone za pružene zdravstvene usluge u drugim zdravstvenim ustanovama,
- rješavanje urgentnih potreba zdravstvenih ustanova u cilju kontinuiteta pružanja usluga,
- praćenje i sprečavanje širenja novog korona virusa i poduzimanje neophodnih mjera u cilju zaštite stanovništva od zaraznih bolesti, poduzimanje mjera i aktivnosti da se omogući adekvatno liječenje pacijenata pozitivnih na COVID-19.

## **4. Izvori sredstava**

Budžetom Zeničko-dobojskog kantona za 2022. godinu („Službene novine Zeničko-dobojskog kantona“, broj: 1/22) na razdjelu 21 – Ministarstvo zdravstva, budžetska organizacija 01, potrošačka jedinica 0001, ekonomski kod 615100, pozicija „Kapitalni transferi drugim nivoima vlasti - za zdravstvo“ planirana su sredstva u iznosu 3.000.000,00 KM, a Odlukom Vlade Kantona broj: 02-11-3871/22 od 10.03.2022. godine utvrđena je raspodjela planiranih sredstava za kapitalne transfere za zdravstvo i to 2.550.000,00 KM za redovne kapitalne transfere i 450.000,00 KM za kapitalne transfere u funkciji sprečavanja širenja zarazne bolesti izazvane virusom COVID-19 i liječenja zaraženih pacijenata.

Realizacija se ostvaruje donošenjem programa utroška sredstava i odgovarajućih akata (odluka) o odobravanju sredstava od strane Vlade Zeničko-dobojskog kantona, a prema operativnim

planovima potrošnje usklađenim sa procentom ostvarenja javnih prihoda, osim u slučajevima odobrenim posebnom odlukom Vlade Kantona.

## **5. Korisnici programa**

Korisnici Programa su javne zdravstvene ustanove sa područja Zeničko-dobojskog kantona. Programom je potrošnja planiranih sredstava za kapitalne transfere za zdravstvo u 2022. godini podijeljena u dvije cjeline:

- Kapitalni transferi javnim zdravstvenim ustanovama za redovne kapitalne transfere u iznosu 2.550.000,00 KM, od čega se na JU Kantonalna bolnica Zenica odnosi 2.000.000,00 KM, a na ostale javne zdravstvene ustanove 550.000,00 KM.
- Kapitalni transferi zdravstvenim ustanovama za neohodne nabavke koje su u direktnoj funkciji sprečavanja širenja zarazne bolesti izazvane virusom COVID-19, liječenja COVID-19 pozitivnih pacijenata i provođenja vakcinacije u iznosu 450.000,00 KM.

## **II PROGRAMI**

### **1. Kapitalni transferi javnim zdravstvenim ustanovama za redovne kapitalne transfere (planirani iznos 2.550.000,00 KM)**

#### **1.1. Kapitalni transferi JU Kantonalna bolnica Zenica za redovne kapitalne transfere - planirani iznos 2.000.000,00 KM**

Vlada Zeničko-dobojskog kantona već duže vrijeme u Budžetu Zeničko-dobojskog kantona planira značajna sredstva namijenjena JU Kantonalna bolnica Zenica za nabavku opreme i druga ulaganja koja imaju karakter stalne imovine sukladno članu 13. Zakona o zdravstvenoj zaštiti („Službene novine Federacije Bosne i Hercegovine”, broj: 46/10 i 75/13), obzirom da se radi o zdravstvenoj ustanovi čije je osnivač Vlada Kantona i ustanovi od opšteg značaja za liječenje pacijenata sa područja Zeničko-dobojskog kantona.

Nabavkom nove i savremenije opreme doprinosi se većem kvalitetu zdravstvene zaštite, smanjenju listi čekanja, većoj zaštiti pacijenata, ali i zdravstvenih radnika prilikom izvođenja određenih zahvata, povećanju broja usluga koje se pružaju pacijentima.

Obzirom na starost objekta JU Kantonalna bolnica Zenica, izgradnjom i adaptacijom građevinskih objekata doprinosi se humanizaciji uslova u kojima pacijenti borave, boljim uslovima rada uposlenika, pružanju zdravstvenih usluga na višem nivou i sl.

Odlukom o raspodjeli sredstava planirana sredstva u iznosu 2.000.000,00KM, JU Kantonalna bolnica je svojim zahtjevom broj: 01-11-1605/22 od 04.03.2022. godine i utvrđenim prioritetima rasporedila na nabavku medicinske opreme, građevinske radove i nabavku rezervnih dijelova, uzimajući u obzir već zaključene ugovore o nabavci i pokrenute postupke javnih nabavki u skladu sa Planom javnih nabavki ove zdravstvene ustanove.

Planirana sredstva za kapitalne transfere za JU Kantonalna bolnica Zenica iznose 2.000.000,00 KM ili 78,4% ukupno planiranih sredstava namijenjenih za redovne kapitalne transfere za zdravstvo.

Na zahtjev JU Kantonalna bolnica broj: 01-11-1605/22 od 04.03.2022. godine, a prema prioritetima koje je iskazala ova zdravstvena ustanova, za nabavku medicinske opreme, građevinske radove i nabavku rezervnih dijelova planirano je sljedeće:

| <b>Redni broj</b> | <b>Vsta ulaganja</b>                                           | <b>Planirana sredstva po Programu</b> |
|-------------------|----------------------------------------------------------------|---------------------------------------|
| 1.                | Nabavka medicinske opreme                                      | 1.224.614,49 KM                       |
| 2.                | Građevinski radovi                                             | 757.250,51 KM                         |
| 3.                | Nabavka rezervnih dijelova za medicinsku i nemedicinsku opremu | 18.135,00 KM                          |
|                   | <b>UKUPNO</b>                                                  | <b>2.000.000,00 KM</b>                |

Planirana sredstva za **nabavku medicinske opreme** u ukupnom iznosu od **1.224.614,49 KM** dijelom se odnose na ranije zaključene ugovore o nabavci medicinske opreme, odnosno na dio troškova koji će po osnovu tih ugovora teretiti 2022. godinu, a dio na planirane nove nabavke u 2022. godini, prema prioritetima koje utvrdi JU Kantonalna bolnica Zenica.

JU Kantonalna bolnica Zenica je zaključila sa „Diamedic“ d.o.o. Sarajevo Ugovor broj: 33-04-4718/20 od 24.08.2020. godine, kojim je ugovorena nabavka medicinske opreme za nadogradnju aparata magnetne rezonance - Magnetom Avanto, proizvođača „Siemens“ - „UPGRADE MR“. Ukupno ugovorena cijena iznosi 1.753.245,00 KM (sa PDV-om). U skladu sa članom 6. Ugovora, 30% ugovorene cijene plaćeno je avansno po zaključenju Ugovora, dok se ostatak ugovorene cijene plaća u 24 jednake mjesečne rate (24 x 51.136,31 KM), nakon isporuke i instalacije opreme. U 2021. godini je za realizaciju ovog Ugovora iz Budžeta Zeničko-dobojskog kantona izdvojeno 460.226,81 KM. Obaveze JU Kantonalna bolnica Zenica po ovom Ugovoru u 2022. godini iznose 613.635,84 KM i iste će biti finansirane iz Budžeta Zeničko-dobojskog kantona za 2022. godinu.

JU Kantonalna bolnica Zenica je zaključila sa „Diamedic“ d.o.o. Sarajevo Ugovor broj: 32-04-8446/21 od 31.12.2021. godine za nabavku spect kamere u ukupnoj vrijednosti 1.168.666,20 KM sa PDV-om, sa uslovima plaćanja 50% avansno u iznosu od 584.333,10 KM, a ostatak ugovorene cijene plaća u 24 rate po 24.347,21 KM. U skladu sa ugovorenim obavezama, troškovi koji će teretiti 2022. godinu i biti finansirani iz Budžeta Zeničko-dobojskog kantona za 2022. godinu iznose 146.083,28 KM ( šest mjesečnih rata nakon isporuke i instaliranja opreme). Treba napomenuti da je JU Kantonalna bolnica izvršila avansnu uplatu po osnovu ovog Ugovora, koja je finansirana sredstvima po osnovu Ugovora o dodjeli sredstava „Tekući transfer drugim nivoima vlasti i fondovima - Transfer za sanaciju zdravstvenih ustanova u Federaciji Bosne i Hercegovine“ iz Budžeta Federacije Bosne i Hercegovine za 2021. godinu.

JU Kantonalna bolnica Zenica je zaključila sa „Tuzlafarm“ d.o.o. Tuzla Ugovor broj: 32-04-271/22 od 14.01.2022. godine za nabavku elektromotora sa odgovarajućim akcesorijima za kranijalne i spinalne procedure za potrebe Odjela neurohirurgije, čija ukupna ugovorena vrijednost iznosi 57.774,60 KM sa PDV-om.

Od preostalog iznosa planiranih sredstava u okviru ukupno odobrenih sredstava za nabavku medicinske opreme (407.120,79 KM) planirane su nabavke flet detektora, špalt lampe, rezervne

osmoze sa predtretmanom vode i druge medicinske opreme obuhvaćene Planom javnih nabavki JU Kantonalna bolnica Zenica, za koje su pokrenuti ili će biti pokrenuti postupci javnih nabavki.

Za **građevinske radove** planirana su sredstva u ukupnom iznosu od **757.250,51 KM**, od čega se na građevinske radove na rekonstrukciji prostora na Odjelu nuklearne medicine odnosi 52.770,51 KM po osnovu Ugovora broj:32-02-1242/22 od 21.02.2022. godine, zaključenog sa „Tecta“ d.o.o. Travnik, a od preostalog iznosa sredstava, planirani su radovi na rekonstrukciju WC-a na Odjelu hirurgije, radovi na razvodu kisika na Odjelu pulmologije i Odjelu dijabetologije i rekonstrukcija koronarne jedinice na drugom spratu Odjela interne medicine. Za nabavku radova na rekonstrukciji WC-a na Odjelu hirurgije, postupak javnih nabavki je u fazi potpisivanja ugovora, a za ostale nabavke građevinskih radova vrši se priprema tenderske dokumentacije.

Za **rezervne dijelove** planirana su sredstva u iznosu **18.135,00 KM** za nabavku rezervnih dijelova za gamma kameru za potrebe Odjela nuklearne medicine u iznosu 18.135,00 KM po osnovu Okvirnog sporazuma broj:32-04-1484/22 od 02.03.2022. godine, zaključenog sa „Medpoint“ d.o.o. Sarajevo.

### **Kriterij za dodjelu sredstava**

Prioritetne nabavke u okviru planiranih sredstava utvrđuje menadžment JU Kantonalna bolnica Zenica. Za dio već zaključenih ugovora o nabavci opreme i građevinskih radova, koji terete 2022. godinu, na prijedlog JU Kantonalna bolnica Zenica, Ministarstvo zdravstva će Vladi Kantona predložiti odluke o odobravanju sredstava za obaveze koje po ugovorima o nabavci terete 2022. godinu. Za ostale nabavke koje su prema prioritetima koje je utvrdila JU Kantonalna bolnica Zenica u okviru planiranih sredstava, zdravstvena ustanova će provesti postupak nabavke opreme, građevinskih radova i rezervnih dijelova u skladu sa Zakonom o javnim nabavkama („Službeni glasnik Bosne i Hercegovine”, broj: 39/14) i planom nabavki ove zdravstvene ustanove usklađenim sa Programom.

Nakon okončanja postupka javnih nabavki JU Kantonalna bolnica Zenica podnosi zahtjev Ministarstvu zdravstva za odobravanjem sredstava. Na prijedlog Ministarstva zdravstva, Vlada Zeničko-dobojskog kantona donosi odluke o odobravanju sredstava.

Uslovi transferisanja sredstava na žiro-račun JU Kantonalna bolnica Zenica broj: 134-010-0000339717 otvoren kod ASA banke, precizirat će se svakom pojedinačnom odlukom o odobravanju sredstava sukladno zaključenim ugovorima.

JU Kantonalna bolnica Zenica obavezna je Ministarstvu zdravstva dostaviti dokaze o izmirenju obaveza dobavljaču, prema uslovima iz zaključenih ugovora o nabavci.

### **1.2. Kapitalni transferi ostalim javnim zdravstvenim ustanovama za redovne kapitalne transfere - planirani iznos 550.000,00 KM**

U okviru planiranih sredstava za ostale javne zdravstvene ustanove planiran je iznos od **263.000,00 KM** za **Zavod za medicinu rada i sportsku medicinu Zeničko-dobojskog kantona**, koji se odnosi na:

- realizaciju Odluke o odobravanju sredstava za sufinansiranje Projekta „Investicije i mjere energetske efikasnosti u poslovnu zgradu JU Zavod za medicinu rada i sportsku medicinu Zeničko-dobojskog kantona“, broj: 02-11-9985/21 od 13.07.2021. godine, kojom su odobrena sredstva u iznosu 62.358,54 KM, dok se preostali iznos sredstava finansira od

strane Fonda za zaštitu okoliša Federacije Bosne i Hercegovine (Ugovor o dodjeli finansijskih sredstava broj: 01-09-2-2037/2021 od 26.04.2021. godine). Navedena Odluka nije realizovana u 2021. godini, zbog uloženi žalbi na provedeni postupak javne nabavke, te je izvjesno da će biti realizovana u 2022. godini i

- nastavak realizacije projekta „Utopljanje objekta JU Zavod za medicinu rada i sportsku medicinu“, koji je se nalazi u Programu javnih investicija Zeničko-dobojskog kantona, kao i prioritarnu nabavku radiološkog ultrazvučnog aparata u ukupnom iznosu 200.641,46 KM.

Za preostala planirana sredstava u iznosu od **287.000,00 KM** Ministarstvo zdravstva je izvršilo raspodjelu planiranih sredstava **ostalim javnim zdravstvenim ustanovama i domovima zdravlja** u sljedećim iznosima:

| Redni broj | Naziv zdravstvene ustanove                       | Linearni iznos u KM | Raspored sredstava prema broju stanovnika | Ukupno            |
|------------|--------------------------------------------------|---------------------|-------------------------------------------|-------------------|
| 1.         | JU Opća bolnica Tešanj                           | 40.000,00           | -                                         | 40.000,00         |
| 2.         | JU Institut za zdravlje i sigurnost hrane Zenica | 40.000,00           | -                                         | 40.000,00         |
| 3.         | Dom zdravlja Breza                               | 5.000,00            | 5.515,00                                  | 10.515,00         |
| 4.         | Dom zdravlja Doboj Jug                           | 5.000,00            | 1.685,00                                  | 6.685,00          |
| 5.         | Dom zdravlja Kakanj                              | 5.000,00            | 15.230,00                                 | 20.230,00         |
| 6.         | Dom zdravlja Maglaj                              | 5.000,00            | 9.310,00                                  | 14.310,00         |
| 7.         | Dom zdravlja Olovo                               | 5.000,00            | 3.785,00                                  | 8.785,00          |
| 8.         | Dom zdravlja Tešanj                              | 5.000,00            | 18.060,00                                 | 23.060,00         |
| 9.         | Dom zdravlja Usora                               | 5.000,00            | 2.610,00                                  | 7.610,00          |
| 10.        | Dom zdravlja Vareš                               | 5.000,00            | 3.180,00                                  | 8.180,00          |
| 11.        | Dom zdravlja Visoko                              | 5.000,00            | 16.085,00                                 | 21.085,00         |
| 12.        | Dom zdravlja Zavidovići                          | 5.000,00            | 14.400,00                                 | 19.400,00         |
| 13.        | Dom zdravlja Zenica                              | 5.000,00            | 44.890,00                                 | 49.890,00         |
| 14.        | Dom zdravlja Žepče                               | 5.000,00            | 12.250,00                                 | 17.250,00         |
|            | <b>Ukupno</b>                                    | <b>140.000,00</b>   | <b>147.000,00</b>                         | <b>287.000,00</b> |

### Kriterij za dodjelu sredstava

Za **domove zdravlja** je planiran iznos od **207.000,00 KM**, a raspodjela planiranih sredstava je izvršena na sljedeći način: linerano planirana sredstva svakom domu zdravlja u iznosu po 5.000,00 KM, a preostali iznos od 147.000,00 KM srazmjerno broju stanovnika, prema podacima preuzetih iz publikacije „Zeničko-dobojski kanton u brojkama“ iz juna 2021. godine, koju izdaje Federalni zavod za statistiku.

Nakon usvajanja Programa, Ministarstvo zdravstva će uputiti dopis svim zdravstvenim ustanovama o visini opredijeljenih sredstava, s ciljem da se zdravstvene ustanove očituju koju vrstu opreme će finansirati iz odobrenih sredstava, uz mogućnost vlastitog učešća, nakon čega će se donijeti odluke o odobravanju sredstava.



Zdravstvena ustanova kojoj Vlada Kantona odobri sredstva provodi postupak javne nabavke u skladu sa Zakonom o javnim nabavkama („Službeni glasnik Bosne i Hercegovine”, broj: 39/14), a namjenski utrošak sredstava se dokazuje zaključivanjem ugovora o nabavci i dokazom o uplati sredstava dobavljaču.

**2. Kapitalni transferi javnim zdravstvenim ustanovama za neohodne nabavke koje su direktnoj funkciji sprečavanja širenja zarazne bolesti izazvane virusom COVID-19 i liječenja COVID-19 pozitivnih pacijenata (planirani iznos 450.000,00 KM)**

U skladu sa Odlukom o raspodjeli planiranih sredstava u Budžetu Zeničko-dobojskog kantona za 2022. godinu na poziciji „Kapitalni transferi drugim nivoima vlasti - za zdravstvo“, broj: 02-11-3871/22 od 10.03.2022. godine, iznos od 450.000,00 KM planiran je za nabavke koje su direktnoj funkciji sprečavanja širenja zarazne bolesti izazvane virusom COVID-19 i liječenje COVID-19 pozitivnih pacijenata.

**Kriterij za dodjelu sredstava**

U skladu sa higijensko-epidmiološkom situacijom koju prati Krizni štab Ministarstva zdravstva i urgentnim potrebama zdravstvenih ustanova, Ministarstvo zdravstva će predlagati Vladi Kantona odluke o odobravanju sredstava za nabavke iz ovih sredstava.

Zdravstvena ustanova kojoj Vlada Kantona odobri sredstva provodi postupak javne nabavke u skladu sa Zakonom o javnim nabavkama („Službeni glasnik Bosne i Hercegovine”, broj: 39/14), a namjenski utrošak sredstava se dokazuje zaključivanjem ugovora o nabavci i dokazom o uplati sredstava dobavljaču.

Imajući u vidu da je u prethodne dvije godine nabavljena značajna oprema za potrebe liječenja COVID-19 pozitivnih pacijenata, u slučaju da se u toku 2022. godine ne ukaže potreba za nabavkama opreme i građevinskih radova koje su u funkciji liječenja COVID-19 pacijenata, Ministarstvo zdravstva će navedena planirana sredstva preusmjeriti na druge pozicije u Budžetu.

Broj: 02-\_\_\_\_\_/22  
Datum, 25.03.2022. godine  
Zenica

**PREMIJER**  
**po ovlaštenju**

*Spahija Kozlić*

DOSTAVLJENO:

1x Ministarstvo zdravstva,  
1x Ministarstvo finansija,  
1x a/a.